



UN VISITA IN BERLIN PRO MANGIAR SALSICIAS A CARI

Le narrator: *Omne capitales es plen de surprisas – locos e cosas curiose que on assolutamente non expecta. Berlin, le capital de Germania, es nulle exception. Nostre amicos discoperi un specialitate culinari que es tipicamente german.*

Anna: *(studia su libro de guida)* Isto sona amusante. Audi: “Discoperi le historia del salsicia a cari in le Museo German de Salsicias a Cari!”

Paulo: Un museo de salsicias a cari? Illes es folle, ille germanos!

Petro: Io non mesmo sape que es salsicias a cari. Es isto un specialitate german?

Anna: Absolutamente. Secundo le guida on mangia – solmente in Berlin – circa 70 milliones de salsicias a cari per anno.

Paulo: 70 milliones? Isto es incredibile.

Anna: Si, isto es multo, ma ora quando nos es in Berlin, nos debe naturalmente anque gustar iste specialitate.

Petro: Ma que es un salsicia a cari?

Paulo: Illo es un longe salsicia rostite o frite que on trencha e servi calide e humidificate in un parve tabuliero de carton con un sauce brun de ketchup o tomates e – naturalmente – con jalne pulvere de cari e con un bastonetto practic pro mangiar lo.

Anna: E on sempre ha o pecias de pan o pommes frites con le salsicia.

Petro: Vermente exotic! Ma illo pote esser bon. Io amarea gustar lo.

Anna: Anque io. Io ha vidite in le guida que ante le aeroporto on ha arrangiate un restaurante de salsicias a cari in un wagon de traino ponite foras de servicio.

Petro: Superbe. Lassa nos visitar lo. Nos pote usar le billetes de tres dies que nos comprava iste matino. Illos anque vale pro le viage al aeroporto.

Narrator: *Le tour allora va al aeroporto, e*



toto correcte: Ante le entrada il ha un wagon de traino foras de servicio in colores jalne e rubie, ubi on pote comprar salsicias a cari. Le tres amicos entra e compra cata uno un parve tabuliero de carton con le delicatessa berlinese.

Paulo: Uhm, isto me gusta. Illo es delicate.

Petro: De accordo, mesmo si io ja senti que io non pote mangiar toto. Le sauce es forte e un poco troppo piccante secundo mi gusto.

Anna: Si, io anque non es secur que isto deveni mi favorito, ma on debe essayar le repastos local, quando on es turista in un pais, e in quantitates limitate un salsicia a cari me sembla bon.

Paulo: Tu parlava de un museo del salsicias, Anna. Io non spera que on exhibi salsicias vetere...

Petro: Ha ha, preferibilemente non.

Anna: Le museo es in le centro de Berlin, solmente 100 metros del famose Checkpoint Charlie. Le idea me pare si estranie que nos *debe* visitar lo.

Paulo: De accordo, dunque al centro! Nos pote mangiar le resto de nostre salsicias durante le tour in traino.

Narrator: *Tosto nostre amicos sta ante le entrada de “Deutsches Currywurst Museum”.*

Paulo: Io repete: Illes es folle, ille germanos! Vide iste parve camion de reclamo. Illo pare un poco como un enorme salsicia rubie con jalne pulvere de cari disperse super toto.

Petro: Si, illo certo attrahe le attention, quando illo va in le traffico in Berlin.

Anna: Ma vide la – in le fenestra del museo! Oh, parve salsicias de pluche, ha ha, illos es amusantissime! Io vole comprar uno.

Paulo: Si, isto non me surprande.

Petro: Audi isto: On pote leger ci al placard que le salsicia a cari esseva inventate in 1948 in Hamburg o in 1949 in Berlin. In le grande urbes post le guerra on non poteva acquirer mustarda, e assi esseva inventate le sauce special con cari e ketchup in vice con varie species como paprika dulce, mentha piperate, pipere de Cayenne e muscato.

Paulo: Impressionante. E audi isto: Un motto trovate in un boteca que vende salsicias a cari dice in germano: “Vor dem Wurst sind alle gleich” – ante le salsicia



nos es omnes equal. Ha ha, isto es phantastic.

Anna: Que nos entra, seniores, e bon appetito!

Petro e Paulo: Gratias!



UN VISITA IN BERLIN PRO MANGIAR SALSICIAS A CARI

1 Associa cata parola con un expression o un synonymo.

- | | | | | |
|-----|--------------------------|--------------|----|--|
| 1. | <input type="checkbox"/> | cari | A. | in un parve numero |
| 2. | <input type="checkbox"/> | guida | B. | material molle usate pro fabricar p.ex. ursos |
| 3. | <input type="checkbox"/> | mustarda | C. | libro touristic que describe cosas attractive |
| 4. | <input type="checkbox"/> | specialitate | D. | peculiar |
| 5. | <input type="checkbox"/> | tabuliero | E. | un specie jalne e possibilmente forte |
| 6. | <input type="checkbox"/> | limitate | F. | secar in pecias |
| 7. | <input type="checkbox"/> | pluche | G. | stupide |
| 8. | <input type="checkbox"/> | trenchar | H. | crema dense e jalne-brun con un gusto forte |
| 9. | <input type="checkbox"/> | estranie | I. | un mangiar typic pro un area geographic |
| 10. | <input type="checkbox"/> | folle | J. | un utensile platte de ligno usate pro servir cosas |

2 Lege le texto de novo, e responde, si le phrases es ver (V) o false (F).

- | | V | F |
|---|--------------------------|--------------------------|
| 1. Le wagon de traino foras de servicio sta in le aeroporto. | <input type="checkbox"/> | <input type="checkbox"/> |
| 2. Anna demanda un homine pro apprender del salsicias a cari. | <input type="checkbox"/> | <input type="checkbox"/> |
| 3. Le sauce pro le salsicia consiste de mustarda e tomates. | <input type="checkbox"/> | <input type="checkbox"/> |
| 4. Le camion de reclamo ante le museo es brun e jalne. | <input type="checkbox"/> | <input type="checkbox"/> |
| 5. Le motto dice: Ante le salsicia nos omnes ha fame. | <input type="checkbox"/> | <input type="checkbox"/> |

3 Selige le bon parola pro completar le phrase.

- Illes es folle, ille ...
 - germanos
 - salsicias
 - camiones
- On debe essayar le repastos local, quando on es ...
 - tabuliero
 - aeroporto
 - turista
- Nos pote usar le ... que nos comprava iste matino pro ir al centro del urbe.
 - ketchup
 - billetes
 - gusto
- In le museo on pote comprar parve salsicias de ...
 - pluche
 - cari
 - tomates
- Le restaurante es arrangiate in un ... foras de servicio.
 - specialitate
 - mentha
 - wagon